

Kalaallit Nunaanni nammineq aningaasartuutiginagu eqqartuussisulersuussisarneq pillugu nalunaarut

Kalaallit Nunaanni eqqartuussisarneq pillugu inatsimmi § 254, imm. 3 aamma § 256 naapertorlugit, tak. inatsimmik nalunaarut nr. 1186, 18. september 2023-imeersoq, aalajangersarneqarpoq:

§ 1. Nammineq aningaasartuutiginagu eqqartuussisulersuussineq pillugu aalajangiinerni isertitanit akileraarutit pillugit Inatsisartut inatsisaanni § 75 malillugu isertitat A-t aamma isertitanit akileraarutit 10.000 kr.-inik ilanngaasikkat pillugit Inatsisartut inatsisaanni § 74 malillugu isertitat B-t, tak. Kalaallit Nunaanni ingerlatseqatigiiffiit iluanaarutinit akileraarutaannit iluanaarutaasinnaasunit ilassutit ilanngullugit isertitaasa akileraarusernissaat pillugu Inatsisartut inatsisaanni § 21, imm. 2 malillugu assigiimmik ilanngaas, tak. isertitanit akileraarutit pillugit Inatsisartut inatsisaanni § 86, katinnerat isertitanut tunngavittut atorineqassaaq.

Imm. 2. Imm. 1 malillugu naatsorsuinerni ukiup siuliani isertitat inaarutaasumik naatsorsukkanit ersertut aamma ukiumi pineqartumi Kalaallit Nunaanni ingerlatseqatigiiffiit iluanaarutigisinnaasaannut uppersaasatit malinneqassapput.

Imm. 3. Qinnuteqaateqartup isertitai tunngaviusut imm. 1 malillugu naatsorsorneranni 385.000 kr.-iuppata ikinneruppataluunniit Kalaallit Nunaanni eqqartuussisarnermik inatsimmi § 254 malillugu nammineq aningaasartuutiginagu eqqartuussisulersuussisoqarnissaa nalunaarutigineqarsinnaavoq. Qinnuteqaateqartoq inooqateqarpat aappariit ataatsimut isertitaat 490.000 kr.-iuppata ikinneruppataluunniit nammineq aningaasartuutiginagu eqqartuussisulersuussisoqassasoq nalunaarutigineqarsinnaavoq. Aappariit suliami akerleriinnik soqutigisaqarpata, qinnuteqaateqartup nammineq isertitai aamma kisimiittut isertitaannut killiliussaq malinneqassaaq. Tak. Kalaallit Nunaanni eqqartuussisarnermik inatsimmi kapitali 27, aappariinneq imaluunniit angajoqqaatut oqartussaaneq pillugu suliani qinnuteqaateqartup nammineq isertitaannut aamma kisimiittut isertitaannut tunngatillugu killiliussaq aamma malinneqassaaq.

Imm. 4. Imm. 3-mi aningaasat meeqqanut tamanut 67.000 kr.-nik qaffanneqassapput, qitornassat qitornarsiallu 18 inorlugit ukiullit qinnuteqaateqartumi najugallit taassumangaluunniit pilersorneqarnerusut ilanngullugit eqqarsaatigalugit.

§ 2. Tunngaviusumik isertitat § 1, imm. 1 malillugu naatsorsorneranni qinnuteqaateqartup isertitai paasissutissiissutigeqquneqartunit allaanerungaatsiarpata massakkut isertitat tunngavigineqassapput. Tamannattaq qinnuteqaateqartup tunngaviusumik isertitaannut naatsorsorneqanngitsunut atuuppoq.

§ 3. Qinnuteqaateqartuq 18 inorlugit ukioqarpat angajoqqaat aningaasaqarnerat aammattaaq eqqarsaatigineqassaaq.

§ 4. § 1 aamma § 2 apeqqutaatinnagit suliami aningaasartuutit pisarnermit annertunerunissaat missingersorneqarpat ileqqoq malinnagu nammineq aningaasartuutiginagu eqqartuussisulersuussinissaq nalunaarutigineqarsinnaavoq.

§ 5. Nammineq aningaasartuutiginagu eqqartuussisulersuussinissaq pillugu qinnuteqaateqartut arlariuppata suliami aningaasartuutit qinnuteqaateqartut ataatsimoorlutik akilersinnaaneraat aalajangiiniarnermi eqqarsaatigineqassaaq.

Imm. 2. Suliap inernera arlariinnut pingaaruteqarpat qinnuteqaateqartuq ataasiinnaagaluarpalluunniit tamannattaaq atuutissaaq.

§ 6. Eqqartuussisulersuussinissamik qinnuteqaateqartup naammattunik tunngavissaqarneranik nalilersuineri makku ilaatigut ilanngunneqassapput

- 1) Suliap qinnuteqaateqartumut pingaarutaa,
- 2) Qinnuteqaateqartup suliami taperserneqarnissaa ilimanarnersoq,
- 3) Suliami pineqartup annertussusia,
- 4) Aningaasartuutissatut naatsorsuutigisat annertussusiat,
- 5) Suliaq allaffissornikkut suliarineqarsinnaanersoq aamma
- 6) Suliaq atuisartut naammagittaalliuteqartarfiannit, ineqarneq pillugu naammagittaalliuteqartarfimmit tamakkununngaluunniit assingusumik naammagittaalliuteqartarfimmit aalajangiiffigineqarsinnaanersoq.

§ 7. Akileraarutitut oqartussat 2023-mut inaarutaasumik naatsorsugaat ilanngullugit qinnuteqaateqartup nassiutissavai. Qinnuteqaat december 2025-mi tunniunneqassappat taamatuttaaq 2024-mut inaarutaasumik naatsorsukkat ilanngunneqassapput. Qinnuteqaateqartuq inooqateqarpat inooqataasumut inaarutaasumik naatsorsukkat ilanngunneqassapput. Taamaattorli aappariit suliami akerleriinnik soqutigisaqarpata tamanna atuutissanngilaq.

Imm. 2. Ukiumi isertitaqarfimmi 2023-mi qinnuteqaateqartuq inooqataasorluunniit Kalaallit Nunaanni ingerlatseqatigiiffinnit iluanaarutini akileraarusigassanik tigusaqarsimanersoq qinnuteqaateqartup paasissutissiissutigissavaa, taamaattoqarpallu tamatumunnga uppersaatt ilanngunneqassaaq.

Imm. 3. Meeqqat amerlassusiat qinnuteqaateqartup paasissutissiissutigissavaa, qitornassat qitornarsiallu 18 inorlugit ukiullit qinnuteqaateqartumi najugallit imaluunniit taassumanga pilersorneqarnerusut ilanngullugit eqqarsaatigalugit.

Imm. 4. Inatsisitigut ikiorneqarnissamut sillimmasiisoqarsimanersoq qinnuteqaateqartup paasissutissiissutigissavaa taamaattoqarpallu sillimmasiisarfiup aqqa policenormulu.

Imm. 5. Paasissutissanik allanik suliap suliarineqarnissaanut atugassanik Kalaallit Nunaanni Naalagaaffiup Sinniisuata aamma Civilstyrelsip qinnuteqaateqartoq pissarseqqusinnaavaa.

§ 8. Nalunaarut manna atuutilerpoq ulloq 1. januar 2025.

Imm. 2. Qinnuteqaatinut 1. januar 2025-mi kingusinnerusukkulluunniit suliarineqartussanut nalunaarut atuutissaaq, eqqartuussisulersuut nammineq aningaasartuutiginagu qinnuteqaatigineqartoq ulloq taanna sioqqullugu naammassineqarsimappat.

Imm. 3. Kalaallit Nunaanni nammineq aningaasartuutiginagu eqqartuussisulersuussineq pillugu nalunaarut nr. 1525, 8. december 2023-meersoq atorunnaarsinneqarpoq. Taamaattorli nammineq aningaasartuutiginagu eqqartuussisulersuussinissamik qinnuteqaatini 1. januar 2025 sioqqullugu inaarlugit suliarineqartuni malinneqassalluni.